

四庫全書

史部

欽定四庫全書

史部

世宗憲皇帝上諭內閣卷三

詳校官左都御史_臣李綬

編修_臣裴謙勛

總校官原任中允_臣王燕緒

校對官主事_臣張培

謄錄舉人_臣吳壽朋

謄錄監生_臣華春芳

欽定四庫全書

世宗憲皇帝上諭內閣卷二

康熙六十一年十二月

上諭三十四道

初一日以本月初三日恭移

大衍皇帝梓宮奉安

壽皇殿告祭

上從苦次出望見陳設祭品遂失聲大慟

諭誠親王允祉等曰

皇考明年七旬大慶吾兄弟等方思以

萬壽聖節在

暢春園盡誠致敬供奉甘旨與四海臣民共效無疆之
祝豈意今年此日乃於

乾清宮內作如此陳設耶言念及此心肝摧裂 又奉
上諭曰

先帝平日服御器用俱令陳設於

壽皇殿

又

諭宗室覺羅人員

皇考至仁至厚

恩篤宗支凡宗室覺羅大罪始行薄懲小罪概予寬免歷年
高天厚地之恩無一人及於刑辟者伊等自作罪孽必不得
已始令圈禁朕意曾經

皇考問罪圈禁之人原不可以釋放祇以現遇恩赦姑與釋

放伊等尚有何顏出門嗣後當自念身係宗室覺羅可
閉戶家居安分靜守倘仍不悛改到處往來又經事發
朕決不寬宥定行重治其罪

又奉

上諭每見八旗官員動輒罵及所屬人等父母薄俗如此
所不忍聞先經

皇考常申訓誡至再至三尚未悛改夫該屬人等即有過失
只可指斥其本身於其父母何預且凡事自有國法應

笞責者笞責應題叅者題叅出言詬罵甚屬非理嗣後
仍有辱罵人之父母者許被罵之人即行回明該管大
臣叅奏再宮內太監等亦好罵人父母嗣後如有太監
在街道中罵人者許即重打細綁交與步軍統領轉交
總管太監懲治著步軍統領傳示各城內務府總管傳
示各首領太監通行曉諭永遠禁止

初二日

諭戶部

皇考御極六十餘年澤周兆姓思洽人心凡

巡幸所經州縣小民無不除道清塵趨事恐後古北口一路

為我

皇考每年行幸之地農工商賈皆得瞻仰

天顏親承膏澤今聞

皇考賓天民心不知如何悲痛此路百姓歷年出力實堪憐

憫今將宛平順義懷柔密雲平谷五縣昌平一州雍正

元年應徵正項錢糧一萬四千三百八十兩零盡行蠲

免又

陵寢一路此時正當修道之際亦宜軫恤今將大興三河二縣通州薊州遵化州三州雍正元年應徵正項錢糧一萬三千三百七十六兩零亦盡行蠲免爾部行文該撫徧飭所屬州縣實心奉行務令小民均霑德惠倘有不肖有司私行徵收澤不下究事覺定行重處爾部即遵諭行

初三日奉安

大行皇帝梓宮於壽皇殿諸王大臣等合詞恭懇

皇上節哀奉

上諭我朝自

太祖

太宗

世祖以至

皇考咸貴實行不尚虛文朕遇

皇考大事五內哀痛不能自持諸王大臣以朕過於悲慟公

懇節哀朕思人子之於親喪哭泣擗踊亦庸常之事將來能否仰副

皇考聖意保全骨肉惠養臣民如聖人所云善繼善述朕亦未敢自必但朕受

皇考教誨鞠育迄今四十餘年恩勤篤摯慈愛無窮朕承歡膝下無時不瞻

天仰

聖一旦永別寸心如割觸目增悲至情迫切實不能已朕非

於此自謂盡孝亦非博盡孝之虛名也今朕躬尚能勉強支持倘果不能亦不敢過於哀毀有負

皇考付託之重況

天降縞雪林木皆白自安奉

梓宮羣鴉環繞殿庭哀鳴七夜仰觀

天意俯察物情尚且如此朕能已於沉痛乎今

梓宮奉移壽皇殿朕未釋服之前必每日三次親詣獻食一

月內日一次親詣獻食一月後數日親詣一次如此庶

可稍釋悲思若欲朕銜哀強制則朕心愈無以自解朕
在藩邸從不務一切虛名今惟有行其所安以自盡其
心而已爾諸大臣其諒之不必再奏

初四日禮部奏恭上

皇太后尊號應行典禮儀注奉

上諭欽奉

皇太后懿旨予自幼入宮蒙

大行皇帝深恩備位妃列幾五十年雖夙夜小心勤修內職

未能圖報萬一

欽命予子續承大統實非夢想所期

龍馭升遐予即欲相從冥漠予子皇帝再三諫阻以為老身若逝伊亦欲以身從雪涕含哀情辭懇至予念

先帝付託之重丕基是紹

宗社攸關勉慰其心未伸予志今諸王大臣援引舊典請上尊稱此時

梓宮大事正在舉行淒切哀衷何暇他及尊崇典禮實非予

心所安況予戒慎居心謙冲訓子但願予子體

先帝之心永保令名諸王大臣體

先帝之心各抒忠悃則兆民胥賴海宇蒙休予躬大有光榮
勝於受尊稱遠矣予言字字出於真誠可傳諭諸王大臣
共諒予心勿復固請欽此傳諭總理事務王大臣等知之
本日諸王大臣等具摺懇請

皇太后堅執不允

皇上誠敬諄切叩請再三始奉

慈諭隨降

諭旨曰諸王大臣奏請一疏朕親呈

皇太后再三懇請奉

皇太后懿旨諸王大臣援引舊典懇切陳辭皇帝屢次叩請
予亦無可如何知道了欽此

初五日禮部等衙門將三大節慶賀表式進

呈奏請頒發各省奉

上諭九卿奏請撰擬元旦萬壽冬至表式頒發現今

皇考大事未過百日正哀慕之時朕豈忍升殿受賀元旦冬至賀表應俟雍正二年舉行至萬壽表文非過二十七月斷不可頒發諸王大臣即強行再奏朕亦必不允從
初六日

諭內閣九卿翰林詹事科道朕仰荷

祖宗眷佑續承大統恭上

皇考聖祖仁皇帝

尊諡敬念

太祖高皇帝

太宗文皇帝

世祖章皇帝

三聖相承功高德盛載考典章加上

尊謚因念

孝莊文皇后翊運啓基育成

兩帝朕在冲齡備膺慈愛

孝康章皇后誕育

先皇懿徽流慶

孝惠章皇后德隆福厚篤愛朕躬朕意亦宜並加

尊謚但追尊固出至情而推崇必遵定禮爾等可稽考載籍
酌古準今會同確議具奏俾朕得稍展思慕之誠又念
仁孝皇后作配

皇考孝敬寬仁坤儀懋著

孝昭皇后恪恭溫順樹範宮闈

孝懿皇后徽音淑德慈撫朕躬思勤備至均應恭上

尊諡以昭示萬年爾等一併會同詳察典禮擬奏

又

諭總理事務王大臣奉

皇太后懿旨

孝懿皇后曾撫育皇帝貴妃係

孝懿皇后親妹我意欲將貴妃封為皇貴妃又和妃奉事

先帝最為謹慎將和妃封為貴妃將此與皇帝商議朕惟

皇太后聖心至仁至厚此

旨實為允當貴妃封為

皇考皇貴妃和妃封為

皇考貴妃爾等會同禮部查例具奏

又

諭滿漢部院八旗大臣等諸侍衛近侍及執事人以受

皇考數十年養深恩不忍遠離

梓宮奏請願往

陵寢守護者甚眾若盡行遣去勢有不能朕念

皇考陵寢如照定例止令總管關防等守護朕心實為不忍
朕意欲於諸弟中派出一人封以王爵子姪內派出二
人封以公爵永遠恭代朕躬守護

陵寢此處另降諭旨外應將大學士一員尚書二員侍郎二
員都統二員領侍衛內大臣一員內務府總管一員副
都統二員散秩大臣二員乾清門侍衛四員近侍四員
侍衛藍翎四十員派出守護伊等缺出不必補人此所
派官員將現任滿漢大臣及原品食俸原品致仕並從

前委署人員職名查明開列具奏

初七日

諭總理事務王大臣爾等傳諭直隸各省將軍督撫提鎮
伊等貢獻方物除將食品恭獻至

梓宮前者外其進至朕前者惟藥物可以照常呈進餘者二
十七箇月內俱不得呈進有呈進者朕亦不閱奏事人
等不敢接傳並不記檔二十七箇月後有欲貢獻方物
者先行奏請得旨後方許奏呈

又

諭吏部兵部王大臣等驗看應行革退人員內其曾在軍旅効力身經受傷竟以衰邁革退甚可憫恤著留與伊等職銜再文職官員內除捐納出身而年老庸劣者外其由進士舉人正途出身人員自幼讀書初選知縣即有才力不及革退亦為可憫嗣後將此等人員酌量或授為教職或著原品休致之處吏部會同兵部定議具奏

初八日奉

上諭外藩小台吉到日應給與廩餼不必久留即令起程
各回本處隨到隨令瞻仰

梓宮至於除服之後朕隔一二日至

壽皇殿乘便著蒙古王貝勒貝子公併大台吉十餘人齊集
見朕其各小台吉亦令於景山東門內遠處齊集

初十日

諭總理事務王大臣各部院出稅差官員往年皆公帑無

虧而羨餘又足養贍家口照看親戚族人近日則不然率多虧帑獲罪歸亦無顏見其宗族親戚公私均屬無益

皇考洞鑒其故每將稅務交與地方官管理各省已居其半嗣後稅務悉交地方官監收歲額之外所有羨餘該撫奏聞起解應賞給者再行賞給爾等會同戶部工部議奏

又禮部議覆朝鮮國王送到山東漁採人楊三等被

風飄至伊國審無信票又據奉天將軍咨報楊三等至鳳凰城始將信票交出復被領催雅爾泰失去應將楊三等交山東巡撫確查曾否給票雅爾泰照例治罪奉

上諭朝鮮誠心篤敬臣服我朝歷年已久今將山東漁採船隻飄風到伊國之楊三等十四人送回伊等或實係風飄到彼或匪類借端欲為不法俱未可定嗣後飄風船隻人口有票文並未生事者照舊令其送回若無票

文生事犯法者著朝鮮國即照伊國法懲治此係遵奉朕旨並非伊敢將內地之人私行治罪也如此匪類方知畏懼越境妄行之人便少著九卿詹事科道公同會議具奏

十一日奉

上諭比見八旗官員兵丁內嗜飲沉湎以致面貌改常輕生破產肆行妄為者甚衆其中宣乏材具可用之人朕實憫之惜之著八旗都統各將該屬官兵內酗酒不肖

之徒給限一年或二年令其悛改能改者留之如不能改係官員即行題叅應襲者令人承襲係兵丁即行革退將本佐領下閑散人內揀選人材可用者充補食糧既可以養其生亦可以得其力如此凡嗜飲酗酒之徒自知所懲戒矣若禁止之後仍然不改一經查出并將該管官員嚴行治罪再著行文外省將軍副都統城守尉等一體嚴加約束務令法在必行

十二日奉

上諭年老大臣俱係

皇考所用舊人每由午門外步行入內奏事甚屬勞苦可憫
因此前曾降旨與王大臣等王大臣等以俱令騎馬入
內未免繁擾等語具奏從前

皇考理事之日諸大臣俱預先齊集畧行歇息然後入內奏
事現今伊等既有陳奏事件又請

皇太后安請朕躬安不時入內著將六十五歲以上大臣應
騎馬入內者列名具奏其准騎馬入內大臣由東華門

入者至箭亭前下馬由西華門入者至內務府總管衙門前下馬

又

諭九卿等自

皇考升遐以來朕心哀慕無己一應典禮俱令詳考舊章務從隆備蓋不敢以天下儉於

親也但上之所行下必效之向來八旗官員於喪葬等事已極糜費今見朕備禮如是恐習以成風競尚奢侈而兵

民等或至傾家蕩產殊與朕以禮教天下之意不相副也論語云禮與其奢也寧儉喪與其易也寧戚禮記云喪具稱家之有無載在典籍甚昭著也著九卿等將滿漢職官按其品級分為等次及兵民喪葬務從簡樸毋得僭妄併將婚嫁等禮詳議定例具奏

又

諭刑部恩詔內赦罪一款非朕本心徒開惡人徼倖之門於事有何裨益但朕即位之初諸臣援例陳請不得不

允奏施行凡此罪人皆因其自取之罪並非治之以不應得之罪也此番援赦豁免人等俱宜詳記檔案如既赦之後仍不悛改干犯法紀務將伊等前罪加等罪之著詳悉曉諭

又

諭內閣九卿等陳夢雷原係從耿逆之人

皇考寬仁免戮發往關東

皇考東巡

念其平日稍知學問帶回京師交誠親王處行走累年以來
不思改過招搖無忌不法甚多朕以

皇考恩免之人不忍加誅然京師斷不可留

皇考遺命以敦睦為囑陳夢雷若在誠親王處將來必致有
累九卿等知陳夢雷者頗多或其罪有可原不妨直言
朕即赦免如朕言允當應將陳夢雷并伊子遠發邊外
或有陳夢雷之門生平日在外生事者亦即指名陳奏
又楊文言乃耿逆偽相一時漏網公然潛匿京師著書

立說今雖已服寘刑如有子弟在京者亦即奏明驅遣爾等毋得徇私隱蔽陳夢雷處所存古今圖書集成一書皆

皇考指示訓誨

欽定條例費數十年

聖心故能貫穿今古彙合經史天文地理皆有圖記下至山川草木百工製造海西秘法靡不備具洵為典籍之大觀此書工猶未竣著九卿公舉一二學問淵通之人令

其編輯竣事原稿內有訛錯未當者即加潤色增刪仰副

皇考稽古博覽至意

又理藩院遵

旨將曾經軍前効力荷蒙

聖祖仁皇帝恩眷之蒙古王台吉等分別次序在

梓宮前以

聖祖仁皇帝御用物件賞賜奉

上諭凡此皆

皇考御用之物爾等乃

皇考信任之人故頒賜爾等嗣後當永永思念
皇考恩遇之隆倍加効力

十三日

諭部院各衙門凡出示曉諭原欲利民除弊使人知所遵
奉以昭功令也書云欽乃攸司慎乃出令令出惟行弗
惟反以公滅私民其允懷可見條教號令所係綦重古

聖王兢兢慎之近見各衙門出示或變易舊章或恣徇私意或作威作福或釣譽沽名往往朝夕自為更改彼此互相矛盾胥吏因之以作奸宄小借端以滋擾種種弊竇不可勝舉

先帝嘗深惡之嗣後各衙門遇當禁約曉諭之事務期矢公矢慎協情當理可以永遠奉行者方准出示倘仍蹈舊轍科道官即行叅奏治罪

又

諭戶部自古惟正之供所以儲軍國之需當治平無事之日必使倉庫充足斯可有備無患

皇考躬行節儉裕國愛民六十餘年以來蠲租賜復殆無虛日休養生息之恩至矣而近日道府州縣虧空錢糧者正復不少揆厥所由或係上司勒索或係自己侵漁豈皆因公那用

皇考好生如天不忍即正典刑故伊等每恃寬容毫無畏懼恣意虧空動輒盈千累萬督撫明知其弊曲相容隱及

至萬難掩飾之時又往往改侵欺為那移勒限追補視為故事而全完者絕少遷延數載但存追比虛名究竟全無著落新任之人上司逼受前任交盤彼既畏大吏之勢雖有虧空不得不受又因以啟效尤之心遂借此挾制上司不得不為之隱諱任意侵蝕展轉相因虧空愈甚庫藏全虛一旦地方或有急需不能支應關係匪淺朕深悉此弊本應即行徹底清查重加懲治但念已成積習姑從寬典除陝西省外限以三年各省督撫將

所屬錢糧嚴行稽查凡有虧空無論已經叅出及未經
叅出者三年之內務期如數補足毋得苛派民間毋得
借端遮飾如限滿不完定行從重治罪三年補完之後
若再有虧空者決不寬貸其虧空之項除被上司勒索
及因公那移者分別處分外其實在侵欺入己者確審
具奏即行正法倘仍徇私容隱或經朕訪聞得實或被
科道糾叅將督撫一併從重治罪即如山東藩庫虧空
至數十萬雖以俸工補足為名實不能不取之民間額

外加派山東如此他省可知以小民之膏血為官府之補苴地方安得不重困乎既虧國帑復累民生大負

皇考愛養元元之至意此朕所斷斷不能姑容者前日恩詔中內閣引例開列有豁免虧空一條朕未曾允行誠恐開貪吏徼倖之端而於民間究無裨益也至於署印之官更為緊要必須慎重簡擇諺云署印如行劫

皇考每言及此未嘗不痛恨之蓋署印之人始而百計鑽營既而視如傳舍故肆意貪婪圖飽慾壑或取媚上官供

其索取貽害小民尤非淺鮮其於前任虧空視作泛常
接受交盤復轉授新任苟且因循虧空之弊終不得清
嗣後如察出此等情弊必將委署之上司與署印之員
一併嚴加治罪決不寬貸爾部可即傳諭各省督撫

十五日

諭怡親王允祥等朕受

皇考深恩四十餘年未嘗遠離自

皇考升遐無由再瞻

色笑今追想

音容宛然在目御史莽鵠立精於寫像昔日隨班奏事常觀聖顏

皇考有

御容數軸收藏內府今

皇考高年

聖顏微異於往時著莽鵠立盡心圖寫

御容爾等擇潔淨肅清之地令莽鵠立薰沐敬寫

又

諭總理事務王大臣

皇考於文武官員見一二次即知其居心行事歷久不忘故將一應官員俱調來引見朕不能如此若俱調來引見伊等往返甚苦且此際又致懸缺署理嗣後文武官員內將何等官員以上調來引見何等官員先補授後引見之處爾等與吏部兵部會同詳加定議具奏

又

諭總理事務王大臣從前揀選庶吉士外諸進士俱留京
學習三年伊等若果用心學習猶可如不用心學習則
留京何益嗣後進士內揀選學問好者著令教習年滿
照例補用其餘進士等俱令回籍伊等候缺之處爾等
會同翰林院吏部議奏

十七日奉

上諭內廷各執事人員俱係隨侍

皇考之人其中亦有大臣官員子弟著各該處總管揀選保

奏引見朕酌量錄用有通曉滿漢文者著聲明

又工部查奏臺灣各屬軍器損缺應令賠補奉

上諭去年賊犯朱一貴等作亂官兵俱各効力此項著落
賠補軍器之處俱免其賠補

又戶部奏康熙六十一年河南通省漕糧仍令運送
奉

上諭今年應徵本色米石照常運送其採買米石俱著折
銀解部免其起運次年將本色採買之米石著全運送

十八日刑部將四季奏

聞已結未結事件黃冊進呈奉

上諭各省已結未結事件部內四季繕造黃冊具奏

皇考至聖一經

御覽歷久不忘諸事故能速結朕實不能企及凡定限事件
限內能完與否朕亦不能深知恐定限太緊或有不能
如期之處總理事務王大臣會議具奏

二十日河道總督陳鵬年奏秦家廠等堤工河水漫

溢奉

上諭此漫溢之處不於歲前堵築完竣來年桃汛水發愈難辦理陳鵬年會同楊宗義務於歲前速行堵築完竣該部知道

二十一日

諭總理事務王大臣外藩蒙古諸王貝勒貝子公台吉塔布囊於

太祖

太宗

世祖時誠心効順各著勤勞是以

恩寵優渥世襲罔替復蒙

皇考加恩撫恤六十餘年今因朕御極來朝應召入見賜茶
其如何陞見之處著議奏

又禮部奏請慶賀元旦禮儀奉

上諭禮部奏請元旦詣

皇太后宮行禮并請朕升殿受禮朕轉奏

皇太后奉

皇太后慈諭皇帝登極鉅典攸闕是以前日勉從諸王大臣
之請今雍正元年元旦尚在百日之內何忍即行慶禮欽
此諭爾等知悉至朕元旦升殿前請頒發表式之本已降
諭旨

世宗憲皇帝上諭內閣卷二

欽定四庫全書

世宗憲皇帝上諭內閣卷三

雍正元年正月

上諭二十六道

初二日

諭戶部恩賜老人原爲崇年尚齒而地方賞老人者每州縣動支數千金司府牧令上下通同侵扣吏役復任意需索老人十不得一上負曠典罪不容逭今飭令督撫

嚴查務令有司親自沿鄉訪察照看據實造冊給發不許絲毫侵扣如仍蹈前弊立即叅處如督撫奉行不謹朕若訪出必加以失於覺察之罪再老人九十以上者州縣不時存問其或鰥寡無子及子孫貧不能養贍者督撫以至州縣公同設法卹養或奏聞動用錢糧務令得需實惠

初三日奉

上諭前年因黃河衝決

皇考特遣牛鈕齊蘇勒等堵築修理堤工一切完竣交與楊宗義乃楊宗義不能時時加謹防守致修築之處又復衝決經九卿議將楊宗義革職拏交刑部從重治罪

皇考未即將伊治罪從寬恕免將一切河工俱交與伊令其効力贖罪今被衝決之堤工俱已合龍似屬成功仍著交與楊宗義加謹防守不時修築春日冰融之先務期預爲防守堅固斷不可似從前疎忽又致衝決果能加謹防護即可贖其前愆如將已完堤工再致衝決朕必

重治其罪

初四日總理事務王大臣等議奏八旗官兵米石應准倉場衙門所請將所有六七成米折算添給支放奉上諭所給之米照伊等所奏米色微高尤善如不及所奏米色支給務將倉場大臣該倉監督從重治罪

初六日奉

上諭舊大臣內原任大學士阿蘭泰王熙李光地原任尚書趙申喬伊等俱係在

皇考時宣力効忠之人作何追恤加恩之處總理事務大臣
會同大學士白潢尚書張鵬翮左都御史朱軾查例議
奏

初七日

上召來京叩謁

梓宮之科爾沁達爾汗親王和碩額駙羅卜藏固穆布等入
養心殿

賜茶奉

金史卷一百一十五
卷三
上諭爾等先世俱在

太祖時歸誠効順竭力同心誼若一家懋著勤績爾等皆深沐

皇考加恩愛養之人今聞

皇考升遐相率匍匐奔謁

梓宮哀號擗踊朕心深爲憫惻仰惟

皇考視爾等如子孫於茲六十餘年恩隆情篤今

龍馭上賓屬大位於朕躬朕仰承

皇考付託之重當視爾等亦如一家深加愛養爾等皆仰承
皇考恩養之人

皇考雖已升遐朕嗣大統一如

皇考在位爾等亦宜感念

皇考深恩和衷共勵竭誠効力於國家再爾等衆札薩克等
俱有辦理旗務統轄衆庶之責旗下人員皆係爾等下
屬凡事務期秉公矢慎各撫恤爾屬下人等慎勿擾累

十二日

諭理藩院策凌東洛卜著封貝勒連歲西邊軍興青海王
以下台吉等以上各著勞績

皇考曾降

諭旨於凱旋之日議敘著總理事務王大臣與議政大臣等
將青海王台吉等歷年功績公同查明作何加封施恩之
處定議具奏

又

諭署直隸巡撫趙之垣河南巡撫楊宗義朝廷設官置吏原

以養民遇有災荒即多方撫恤方不負委任之重今據山東巡撫黃炳奏稱直隸河南鄰境小民資生無策間有攜家就近覓食者朕覽奏惻然當此春初農事方興若任其流離則小民何所依歸著即遴選賢員招輯復業核實賑濟務令得所勿失農時仍督飭文武官弁稽察奸慝以安善良方副朕惠養元元之至意

十三日理藩院以來謁

梓宮之蒙古王貝勒貝子公額駙台吉等奏稱世受

金川先生集卷三
國恩至爲深重不忍即歸擬住京師候送

梓宮安奉

陵寢享殿等語轉奏奉

上諭候送

梓宮尚須兩三月若去而復來殊屬勞苦時當春季馬匹必致羸瘦來而復歸必更艱難矣著照王等所請在京候送

梓宮俟安奉

陵寢享殿禮成後令回本地至九月內

梓宮安奉

地宮伊等必復來送正值秋草馬肥可即從伊本處前詣

陵寢是時朕亦必往

陵寢也

十四日奉

上諭各省奏銷除地方正項錢糧及軍需之外其餘一應奏銷
積弊甚大若無部費雖當用之項冊檔分明亦以本內數

字互異或因銀數幾兩不符往來駁詰不准奏銷一有部費即糜費錢糧百萬亦准奏銷或將無關緊要之處駁回以存駁詰之名掩飾耳目咨覆到日旋即議准內外通同欺盜虛冒此等情弊盡在

皇考睿照之中

聖恩寬大未行深究朕今不得不加整理嗣後一應錢糧奏銷事務無論何部俱著怡親王隆科多大學士白潢左都御史朱軾會同辦理

十五日

諭九卿朕受

皇考付託之重撫育羣黎夙夜孜孜惟恐閭閻失所昨山東巡撫奏稱東兗二屬上年二麥失收小民未免困苦直隸河南鄰境之民資生無策亦有攜家覓食者朕覽奏惻然比即飭諭直隸河南巡撫加意撫綏招集復業但兩省巡撫並未奏聞朕恐其視為泛常奉行不力爾等可會同確議或特遣大臣或交與該撫作何賑濟安輯

之法務使窮黎得霑實惠又前歲河南黃水潰決汎溢於直隸地方比年以來兩省近水居民耕種無資衣食匱乏均應加恩撫恤爾等一併議奏

又

諭戶部原任兩江總督常勳奏兩淮巡鹽御史張應詔科派加勛銀兩經工部尚書李先復等審明覆奏爾部駁詰以爲加勛銀兩去年衆商既已供爲張應詔所派今常勳身故衆商遂改前供所審未爲允協朕聞常勳

居官本無令名

皇考亦曾向朕言之其所奏豈可爲準

皇考當日不肯據常例所奏定案故遣大臣前往察審今既已審明不必再行駁詰況張應詔本無科派之事真實難掩衆商安得不改易前供乎至於商人欲以此項銀兩充餉朕豈需此其已交十三萬餘兩准其抵算往年商欠其未完銀二十餘萬兩盡行豁免我

皇考恤商愛民若辦理此事亦必如此歸結也至於衆商歷

年所欠正項關係國帑應作何限年徵收之法爾部確
議具奏

十六日奉

上諭八旗舉人生員內有在護軍執事人行走者俱著退
回若係生員給與二兩錢糧米石係舉人給與三兩錢
糧米石令伊等得以讀書

又奉

上諭八旗滿洲人等除照常考試漢文秀才舉人進士外

至於繙譯技勇亦屬緊要應將滿洲人等考取繙譯秀才舉人進士并武秀才舉人進士著總理事務王大臣等會同該部將作何考試額數多少之處定議具奏

又

上以莊親靖王薨逝降

旨臨奠諸王大臣等懇請停止奉

上諭王大臣等所奏雖是但朕之長輩止有莊親王一人宗親誼篤朕心必欲親往著宗人府並有執事之王大

臣等隨往其餘不必前去

二十三日

諭總理事務王大臣提鎮副將俱係

聖祖仁皇帝簡用之員特將

聖祖仁皇帝所遺弓矢橐韉等項寶物賞與伊等所賞物件
伊等應作何敬謹領受迎接供奉將

聖祖仁皇帝恩澤貽及子孫累世永戴之處爾等會同兵部

議奏

又

諭工部去年黃河漫溢衝決秦家廠一時不能堵塞朕念
數省生民暨東南漕運攸關特遣齊蘇勒前往堵修幸
將秦家廠馬營口俱經堵築完工但冬日冰凍所修工
程或未必堅固目今冰解流澌之時水勢定行稍長况
三月桃花水降其堵築堤岸不可不加保固今楊宗義
丁憂布政使牟欽元署理巡撫印務凡齊蘇勒所需河
工物料及所用官員著牟欽元即行給與毋得遲誤該

部連行文年欽元知之

又

諭直省主考官爾等俱係

皇考選用之人朕諒爾等必能自好是以特簡為主考官爾等到彼處務至公考試取其真實學問優長者爾等果能不徇私聲名好則不但無負朕之選用亦不負

皇考愛養之恩矣回京之日朕自加陞擢如有徇私之處經朕訪聞定行從重治罪決不寬貸

二十四日奉

上諭從前每逢考試常有無賴匪類生事擾犯此風斷不可長著總理事務王大臣傳諭該管衙門考試之前即嚴行曉示倘有此等無賴匪類務將為首之人從重治罪以示儆戒

二十六日

諭都統阿拉錫理藩院尚書特古德爾等傳旨與策妄阿喇布坦之使人曰爾之台吉在我

聖祖皇考時雖有微勞亦多罪戾又無故侵我哈密發兵往
昭殺害喇藏毀壞佛教惟天子統御萬邦理宜興師問
罪我

聖祖皇考至仁如天祇陳師邊境俟爾台吉深悔前非即加
恩寬宥並無意於殄滅爾國也其後因澤卜尊丹巴胡
土克圖再三請赦策妄阿喇布坦之罪我

聖祖皇考念其舊日微勞又憐念胡土克圖老人懇請特允
所奏許令遣使往諭策妄阿喇布坦待其伏罪陳奏到

日即降

恩旨今

聖祖皇考升遐朕繼承大寶胡土克圖老人遠來再爲奏請
故復遣使於爾若爾台吉即使親信之人誠懇陳辭朕
即寬宥以寧爾土宇若冥頑不靈特欲構兵亦可明言
其意欲廣我

聖祖皇考之仁恩亦在爾之台吉欲振我
聖祖皇考之武烈亦在爾之台吉朕仰承

聖祖皇考之心以行我朝兵威亦爾台吉所知也今胡土克圖大喇嘛又已圓寂從此亦無有爲爾台吉奏請之人矣可作速定奪具奏若仍前支吾則兵自爾起無與朕也因爾非專使不與爾勅書爾其謹識朕言往諭爾台吉

二十七日奉

上諭前引見滿洲翰林之日因成文行止不端特加訓諭成文妄奏不知所陳何語近朕令諸翰林各據所知條

奏成文奏摺內有興利除弊等語

皇考聖治又有何弊朕何以除之伊又奏請八旗十五歲以上俱令讀書如此則挑取護軍之處復用何人所奏無一要款恣意瀆陳又復懇辭教習二十阿哥之職人甚狂妄膽大著革職跟隨二十阿哥行走若能改過則已若仍不改必鎖拏監禁

又署直隸巡撫趙之垣題請領賣通倉變色米石戶部議覆准行奉

上諭此案係朕親率爾等辦理之事

皇考因直隸各州縣內有米穀短少之處將通倉變色米石糶賣於民有益並非勒令每處著落糶賣若干不但水次遙遠之州縣雖近水次之地若於民無益亦不勒令糶賣今趙之垣不能領會

皇考原降諭旨之意以二百里以內附近水次之州縣派定數目糶賣具奏如此不但無益且又多此一事戶部即照趙之垣所議准行甚謬此案無庸另批著曉諭趙之

垣將此項變色米石於米穀短少之州縣領去糶賣若
於民有益即行領賣若領運繁難無有益處即行停止
如民間有因米穀短少情願赴通糶買此項米石自行
運回者亦聽其買去

又兵部以三等侍衛李景泰擬補雲南提標右營守
備引

見奉

上諭李景泰係直隸人伊母年邁雲南地方甚遠著以山

東河南地方守備員缺補用

二十九日奉

上諭鑲黃旗護軍叅領赫色常格正白旗護軍叅領赫達
鑲白旗前鋒叅領費揚古護軍叅領巴爾泰此五人年
已老邁皆曾多年効力軍前著以原品致仕准食半俸
各賞銀五十兩

三十日

諭山東巡撫黃炳朕續承大統父母斯民普天之下皆吾

赤子凡身任封疆者當深體朕心遇有災荒及時賑濟使窮黎實被其澤據奏東兗兩屬去歲二麥失收小民未免困苦直隸河南鄰境之民資生無策亦有攜家覓食者朕覽奏惻然爾奏欲各捐已貲以為賑濟朕思爾等貲從何出勢必仍取之於民是賑民實以累民也不如動用倉儲遴選賢員確查乏食窮民分路賑濟小民庶得均霑實惠至鄰省流移之民亦宜一體撫恤毋令失所又奏請平糶倉穀於民食大有裨益必得實心任

事之人方副朕惠養元元之意再奏請漕糧十萬石分貯各縣往年曾經屢次截留此項會否支用所存多寡併如何分貯之處著具本奏聞

又

諭山東巡撫黃炳山東運道淺阻舊例派撥民夫挑淺濟運朕思東省連年薄收百姓困苦未必堪此重役將來流亡日多民生日蹙深為可憫古人救荒之策有大興役以濟民食者不若竟動正項錢糧僱募民夫給以工

食挑濬運河則應僱既多散者復聚民資工食稍延殘喘民心鼓舞工程易就運道早通於興役之中即寓賑濟之意莫便於此已有旨命佟吉圖署理按察使速赴河南與總河齊蘇勒商定回任料理運道俟其到日爾可與公同竭力料理務使小民得霑實惠

又戶部議覆審理兩淮鹽務工部尚書李先復覆奏
一疏奉

上諭李先復等所奏兩淮行鹽國課攸關凡關鹽務之事

督撫理應會同該御史酌量料理等語部覆定例遵行
已久應無庸議但督撫與該御史如相和好即長鹽價
以致病民如不相和好即不巡緝私鹽以致累商嗣後
倘各有臆見著將情由達部聽部定奪



世宗憲皇帝上諭內閣卷三

欽定四庫全書

史部

世宗憲皇帝上諭內閣卷八

四至

詳校官左都御史_臣李綬

編修_臣裴謙覆勘

總校官原任中允_臣王燕緒

校對官主事_臣張培

謄錄監生_臣華春芳

欽定四庫全書

世宗憲皇帝上諭內閣卷四

雍正元年二月

上諭二十五道

初二日

諭總理事務王大臣等凡事當做法

祖宗成憲方為盡善

皇曾祖妣孝莊文皇后大事當發引時

皇考親自恭送

皇祖妣孝惠章皇后大事發引之時

皇考聖躬違和足疾甚重尚且

親送

梓宮啟行諸王大臣豈能勸止乎朕今親送

皇考梓宮至

山陵朕意已定諸王大臣勿再強奏

又辦理土默特事務刑部郎中福住等奏披甲阿納

等盜牛二頭照例立絞奉

上諭偷盜一二牲餽即將蒙古立絞人命重大嗣後應定擬絞監候之罪爾等遵旨暫行一年與往年盜案相較若蒙古從此盜案漸少則照此例行倘蒙古無知法輕多玩而盜案比往年較多則仍照原定之例擬罪

初四日

諭禮部陳鵬年潔已奉公實心爲國因河工決口自請前往堵築寢食俱廢風雨不辭積勞成疾歿於工所聞其

家有八旬之母室如懸罄此真鞠躬盡瘁死而後已之臣傳諭該撫賜司庫銀二千兩其母賜以封典陳鵬年賜以優謚以一品廕其一子

初五日奉

上諭國家養育人材首重翰苑既讀中秘之書必當立品端方居心謹慎方爲不愧官箴聞有僥倖之徒平昔結黨營私至科場年分則互相援引轉為請托遇謹守之人畏干法紀不肯通同作弊反羣相排詆飛語誣陷此

風甚不可長亟當甄別勒令解退回籍以示勸懲著大學士張鵬翮尚書田從典徐元夢朱軾侍郎張伯行李紱會同滿漢掌院學士將翰林院詹事府官員有不安分生事有玷官箴者指名具奏不可徇情

初八日

諭吏部直省教官專司訓迪士子今年幼不通文藝之人捐補教職即爲年長學優者之師可乎伊等既已捐納應照其品級補用別職之處該部議奏

又

諭吏部嗣後銓選月官內有應補應扣者各將何以應補應扣之故明白曉示衆人庶使人心允服

初九日奉

上諭左都御史朱軾係

皇考簡用大臣居官素清朕纘承大統以來實心行走孝行昭著聞伊家有八旬之母恩詔內應封夫人著加賜一品夫人封典并賞該省藩庫銀二千兩爲伊母養贍之

資

初十日

諭總理事務王大臣諸王大臣等外間匪類捏造流言妄
生議論謂朕鍾愛十六阿哥令其承襲莊親王王爵承
受其家產朕爲君上多封諸弟數人爲親王何所不可
而必藉承襲莊親王以加厚於十六阿哥乎現今廉親
王怡親王履郡王朕皆封以親王郡王矣不特此也大
阿哥之子弘昉一間散宗室而現居親王邸第豈伊本

分所應得乎朕欲於諸弟內擇一人封親王令居右翼
尚且不得其人而小人議論乃如此且如發遣一人即議
朕報復舊怨不知其人自犯凌遲重罪本無可生之理
而朕特寬貸其死也又如擢用一人即議朕恩出於私
以新進加于耆舊之上今諸大臣具在歷年以來誰是
朕藩邸往來者如其有之能掩衆人之耳目乎如朕所
用佛格尹泰等於朕何私之有皆朕平日素不相識之
人也佛格係宗室輔國將軍品端學優在

皇考時無薦舉之者故未錄用朕聞其人可用擢伊尚書特欲有裨於政事耳朕前歲往盛京時始識尹泰之面見其為人甚屬明達伊係四格親戚或向曾在二阿哥處行走一二次亦未可定

皇考惜其材品不加罪責授伊盛京佐領置之閒曹而已凡經

皇考治罪者朕又何嘗錄用一人乎即欲評論伊等亦待兩三年後果其劣跡昭彰然後可加指摘乃畧無所據即

以朕所用之人為非何具狂妄古者殷高宗舉傳說於
版築之間朕為天子簡用所知之人乃人君分內之事
臣下何得妄議也勒席恒者儉邪小人伊父蘇努係七
十之黨結為生死之交舉國孰不知之七十等朋比為
奸搖惑人心擾亂國是朕于蘇努父子宥其罪戾疊沛
恩施封蘇努為貝勒授勒席恒領侍衛內大臣御前行
走亦冀其感念朕恩悛改舊惡豈朕畏懼伊等而然耶
勒席恒不但不知感戴而且心無厭足仍然結黨營私

護庇貝子允禵代為支吾巧飾將朕所交之事顛倒錯
謬將朕所降諭旨任意增減致諸王大臣每事掣肘難
於辦理又朕諸弟兄家有奸惡太監數人種種引誘伊
主伊主不法之事皆由伊等而起朕若明正其罪詳審
究擬則牽連甚多伊主亦不可當朕念兄弟之情特欲
保全不加明訊將此輩奸惡小人免死發遣以消釋其
事曾謂勒席恒曰此不過懲治家下惡奴其事甚細不
必存記檔案而勒席恒顯悖朕旨記載檔案其意特欲

後人疑爲事不明白漫將數人治罪以此不令之名歸之於朕也勒席恒於

皇考時並無竭誠効力之處其爲朕効力又復如此乃敢以懇給佐領冒昧陳請狂妄悖謬至矣極矣勒席恒不但不可在內廷行走并不可在外廷行走著革職發往西寧以便伊跟隨允禩爲其効力前大將軍王允禩未到京之時衆人意甚恭敬既到京之後恭敬者轉爲怠玩朕不知此等下愚何所見而然我朝舊制行軍之處必

派王公等前往大將軍王允禎到京後未定應行回任
與否是以諸王大臣議請將貝子允禔派往軍前駐劄
西寧此不過爲國家邊疆起見允禔怠慢不肯起程奏
云俟過百日又云俟

陵寢回來後起程屢次推諉耽延時日誠屬何心朕所不解
朕曾詰允禔曰爾不願往豈不顯背朕旨乎且允禔之
太監何玉柱一至微至賤之人而使有家產至數十萬
伊家何人不可用而用一漢給事中秦道然爲伊府管

領豈非欲圖大事耀內廷太監以財利而要外廷漢人之稱譽乎如此作爲朕即明正其罪禁錮高牆有何不可即置之極典亦有何不可朕今並未革其貝子降其俸祿撤其家奴也代伊懲治家下奸惡太監反謂朕凌逼弟輩揚言無忌悖亂極矣諸弟兄受朕委曲保全之恩不思圖報日每淆亂朕心激朕之怒爾等若自謂忠臣孝子悌弟並無干犯國法之處朕即明指所犯之事宣示於衆朕屢屢寬宥並不知感而反議朕凌逼弟輩

有是理乎朕受

皇考弘恩歷年身居藩邸享安閒之福登極以來不辭勞瘁
事事必求至當治益求治安愈求安誠以

皇考付託神器至重思欲仰副

皇考知人之明否則如前安逸可也何苦乃爾勞瘁耶爾諸
臣理宜感發天良靖共爾位體朕宵旰勤勞以期仰副
皇考知人之明之志同心協力翼贊朕躬俾每事必出於至
是斯乃爾等之職分今輒欲與朕各執其是意欲自居

於是而居朕於非乎朕爲普天率土之主爾等莫非臣
下若任爾等之縱恣朕何以對

聖祖 皇考乎魯論有云三年無改於父之道可謂孝矣朕受
皇考鞠育教誨深恩四十五年今承大統惟思永永無改何
止三年此念出於至誠朕之弟兄及諸大臣一切過犯
無不施恩寬宥豈意衆人並不知感百日之內淆亂朕
心者百端伊等其謂朕寬仁不嗜殺人故任意侮慢乎
此啟朕殺人之端也夫啟朕殺人之端者其人族滅猶不

足以蔽其辜矣如陳夢雷罪大惡極朕尚詢問九卿大臣云陳夢雷如應寬宥爾等秉公具奏僉云陳夢雷罪大惡極斷不可留應行正法朕猶免其死罪將伊一切惡款俱未詳究止坐以發遣之罪繫獄待遣孰知陶賴張廷樞竟將陳夢雷二子擅自釋放陶賴張廷樞之罪甚大朕猶欲保全大臣免其治罪止以降級結案詎意伊等心懷怨憤謂大臣等及朕御前行走之人凡事何必奏聞夫有事預先奏聞朕猶得爲之潛消默化倘事

端初起不即奏聞迨至彰明較著方始具奏不但於事無益且必連累多人矣况奏事止論虛實豈可漫以奏聞之人爲非其以爲非者特欲壅蔽朕之耳目也朕承皇考大統自臨御以來諸王大臣人人得享太平之福朕並無此時姑且容忍待一二年後漸加誅戮之心如朕果懷此心

天地

宗社

皇考神靈鑒之爾等各宜砥礪勿失臣節敬謹遵奉君上果能悛改惡習竭力供職一二年後言語面目之間必有誠於中而形於外者朕自必知如不悛改不思

皇考六十餘年教養深恩不感戴朕保全寬宥之意妄生事端干犯法紀似此犯法之人朕斷不寬宥必行正法前者睿親王將伊同列之王誅戮伊不過攝政王耳如四輔臣時伊等欲誅何人不可朕雖庸懦既爲人主何難將犯法之人正法使朕推廣

皇考之仁慈唯爾等自勉之使朕昭宣

皇考之天威亦爾等自取之朕之諸弟及諸大臣應知朕仰

體

皇考聖心仁愛思欲保全爾等之意出於至誠務必成全朕
之孝思各自竭力供職慎毋干犯國法

十三日

諭禮部致治之要首在風化移風易俗莫先於鼓勵良善
使人人知彝倫天則之為重忠孝廉節之宜敦古帝王

勞來匡直所以納民於軌物者舍是無由也朝廷每遇覃恩詔款內必有旌表孝義貞節之條實係鉅典邇來直省大吏往往視爲具文並未廣諮遠訪祇將有力之家囑託賂遺者漫憑郡縣監司之申詳即為題請建坊而山村僻壤貧寒耕織之人或菽水養親天性篤孝或柏舟矢志之死靡他鄉鄰嗟嘆為可欽而姓氏不傳於城邑幽光湮鬱潛德消沉者何可勝數爾部即行傳諭督撫學政諸人嗣後務令各屬加意搜羅虛公核詢確

卷四
具本人鄉評實蹟題奏旌獎勿以匹夫匹婦而輕為沮抑勿以富家巨族而濫為表揚以副朕成俗化民實心彰善至意

十四日都察院奏請道員內陞外轉奉

上諭陞轉拘定年限未為允協如外任好官因一盜案誣誤不得陞遷豈不可惜嗣後科道官員內陞外轉不必拘定歷俸年限俱行開列

十六日

諭六部尚書侍郎等各部屬員既各分司則各有職守彼此不得干預况每司滿漢共有六員不可謂辦事無人若皆闕冗貪庸何難指名題叅另易其人安可他司越俎代庖孔子曰不在其位不謀其政豈罔聞乎明係鑽營包攬爲漁獵之計嗣後不論何司不論滿漢永遠不得借才能之名一人兼攝數司之事若有緊要事件暫時派出指辦一二事尚可

又

諭戶部治天下要道莫過安民朕纘承大統以來軫念蒼生
痼瘼時切直隸山東河南連年歉收朕特降諭旨緩徵
遣官賑濟每歲京師五城設立粥廠自十月初一日起
至三月二十日止交五城御史煮粥賑饑今尚在青黃
不接之時著展期一月煮粥散賑至四月二十日止但
就食之民來京者多每日各增加銀米一倍務使得需
實惠以副朕憫念窮民至意

又

諭禮部國家抡才大典首重試官主考憑房考閱薦之文
定其去取則一榜衡鑒之當否係於分校諸臣之賢不
肖亦匪輕矣近科以來

皇考慎重闢門籲俊之典於順天鄉試及會試房考官慮其
人邪正不一特命每房各用二人同閱試卷使之互相
覺察彼此鈐制用意良爲周密但法久弊生一房兩考
官豈皆遇秉公持正之人設有一狡黠者叅雜其間即
爲賢者之累况兩人或皆不肖則朋比作奸其害更甚

嗣後仍著照舊定科場條例各房止用一人校閱其責既專其功罪亦難推諉朕纘承大統思欲善繼

皇考旁求俊乂之志務俾鎖闥清肅盡得真才故特酌復舊章防杜弊竇爾部即遵諭行

又

諭都察院從來各衙門募設書辦不過令其繕寫文書收貯檔案但書辦五年方滿爲日既久熟於作弊甚至已經考滿復改換姓名竄入別部潛踪掩跡無所不爲更

有一等積棍名曰缺主獨掌一司之事盤踞其中事無大小一手握定而不肖司官交通賄賂倚為腹心上下朋奸莫可查究書辦尚有更換缺主總無改移子孫相承竟成世業各衙門奸弊叢生未有不由於缺主者自今以後書辦五年考滿各部院堂司官查明勒令回籍候選逗留不歸者著都察院飭五城坊官稽查遣逐至於缺主多捐納官職原有勢力可以抗違爾衙門職掌糾叅立刻查明缺主的名題叅革究押解回籍庶作弊之

本原永絕而官方可以肅清矣著各部院衙門會同確議具奏 又奉

上諭嗣後缺主與年滿書辦發回原籍之處著各部院一年一次保結具奏倘仍有潛居京師者或經朕聞知或被科道題叅將保結具奏之大臣官員一併治罪

又

諭六科給事中監察御史

皇考臨御六十餘年至聖至明無日不以國計民生爲念凡

所以咨訪吏治通達民情之意至爲殷切乃邇年以來
無知小人見科道上疏者少遂疑

皇考不甚信納科道之言又譏言官皆緘默自容此大失

皇考本懷真所謂坐井觀天也殊不知內而滿漢大臣外而
督撫提鎮皆許密摺言事蓋因各省地方事務督撫身
親閱歷自能詳悉周知較言臣風聞無稽之談弗詢之
謀勝什倍矣以此

皇考據所聞見折衷行之大小國政措置咸宜言官無所用

其建言補闕是以

皇考不務求諫之虛名而實於天下之利弊無不洞觀也朕仰承大統一切遵守成憲首以求言為急在京滿漢大臣外省督撫提鎮仍令摺奏外爾等科道諸臣原為朝廷耳目之官與朕躬最親與國家最切凡有所見自應竭誠入告皆當絕去避嫌顧忌之私乃為忠蓋也爾等今雖備位臺垣即將來之公卿大吏為科道時若不能盡言則後日官至大僚豈能期爾建白謀猷乎今著爾

等各科道每日一人上一密摺輪流具奏或二三人同
日各奏一摺一摺祇言一事無論大小時務皆許據實
陳之即或無事可言摺內亦必聲明無可言之故在外
候旨或召進面見或令且退其所言果是朕即施行即
或未甚切當朕亦留中不發決不令一人知之倘有徇
私挾仇顯係情弊巧為瀆奏者亦不能惑朕之耳目也
密摺不許與人叅酌如有漏洩或同僚中知而言之則
同僚即可據以密聞朕將兩人之摺合驗情事爾等能

隱諱推諉乎至於有能面折廷諍或彈劾權要或更革弊端不妨仍照舊露章奏聞朕亦不拒又朕居藩邸時在朝大小官員及

皇考御前之人以至藝術之流從無熟識往來者即藩邸豈無素所任使之人然從不假以顏色信用其言今朕躬攬大權苟欲加之富貴何所不可而肯偏聽其言引為私人乎但朕登極以來所用一二大臣皆深悉其人可用而用之非有念舊徇之心誠恐向日効力微員借稱

王府舊臣在外招搖嚇騙生事干法其害甚大斷難姑容爾等可不時留心察訪一有聞見著即刻密叅切勿畏忌爾諸臣其敬承明諭各抒忠悃毋負朕懸轡設鐸之意

又

諭直省督撫爾等抵任每使家丁管理事務號為堂官往往串通中軍旗牌威嚇勒索且使潛往各屬探聽事件各屬皆有坐省家人與督撫司閤一氣相通爾謂甚密而彼已知之因得預為賄囑若誤信其言則是非顛倒

為害滋甚至走差齎本之人每至驛遞抑勒多端騷擾百
出尤屬不法嗣後著永行禁止不許出入衙門堂上辦
事則遣佐貳官輪班值日奔走出差則於衙役中擇家
道殷實謹厚熟練之人分任仍嚴加察訪若招搖生事
即行革退

十九日禮部以恭上

合天弘運文武睿哲恭儉寬裕孝敬誠信功德大成仁皇帝
尊謚儀注具奏奉

上諭爾部所奏閱

冊

寶儀注內並未議及朕躬行禮之處凡閱

壇廟祝帛悉皆行禮今閱

聖祖仁皇帝冊寶亦當行禮為是爾等酌議具奏禮部恭議
得

皇上聖諭甚是凡閱

壇廟祝帛並皆行禮今閱

冊

寶亦應照闕祝帛儀行一跪三叩頭禮奉

旨是

二十日奉

上諭孫思克之妻係公主長輩且功臣之妻朕意欲令公主穿
孝此事交與該部議奏將內庫銀賞給二千兩派大臣一
員侍衛十員將茶酒往奠東西旗除有承辦事件之大
臣外俱著前往發引之日仍著往送

二十一日戶部摺奏江蘇巡撫吳存禮奏請寬免康熙三十三年以前舊欠蘆課銀兩奉

上諭此項虧空錢糧屢經部駁而該撫仍請豁免此案歷年甚久如果當免即應照所請議行倘不當免則應將該撫一併議處若徒往返駁詰是此事終無結案之期矣著將歷年所奏原案逐一查明議奏

二十三日諸王大臣等奏

皇上追念

先皇悲思篤切躬襄

大事勞瘁倍常伏懇

皇上仰惟

先皇付託之重強抑哀情其詣

壽皇殿拜奠之處乞多隔數日奉

上諭朕哀慕之情誠因

皇考付託鴻基之重故愛惜此身於臣子之道十分未盡二

三朕非強飾以取孝名但朕受

聖祖皇考四十五載顧復教育深恩此舉國所共知者今一旦永訣中心悲痛何能自己目今尚得瞻仰

梓宮罔極哀思乘此猶可稍展至

梓宮睽隔之後何由再得瞻仰

皇考乎朕躬尚能自持朕亦儘力強制諸王大臣所奏知道了

二十五日奉

上諭向來奏銷錢糧不給部費則屢次駁回勒索地方官

朕欲革除此弊特設會考府衙門前降諭旨甚明近見各處奏銷之事並不送會考府各部有擅行駁回者如此則勒索之弊尚未革除也嗣後有應駁之事定須送會考府查看如果應駁會考府王大臣官員列名駁回二十六日奉

上諭從前土默特因遷移臺站殊爲擾累乃伊等於用兵之際知為國家大事看守臺站毫無遲悞甚屬可憫除賞給米糧之外作何按人數加恩賞賜及前往賞賜巡

察臺站或另委人前去或即交與管理臺站人員之處
總理事務王大臣等議奏

二十八日

諭理藩院衙門額駙敦多卜多爾濟策凌貝勒丹晉多爾
濟公傳貝等俱自軍興以來効力有功之人深爲

皇考所軫念傳貝前於

皇考時奉使往和託輝地方甚有勞績其人材亦可用著優
封郡王四額駙敦多卜多爾濟効力行間大兵往西藏

時著有勲績著封親王貝勒丹晉多爾濟自軍興以來辦理伊等喀爾喀各項軍務著有勲績著封郡王此數人者皆於國家鞠躬盡瘁宣力効忠之人朕特先加恩賞其軍前効力勤勞之衆喀爾喀人等自台吉以至兵丁俱著內扎薩克查明具奏朕將加以重恩

二十九日

諭吏部虧空錢糧各官若革職留任催追必致貽累百姓伊等既已獲罪革職豈可復留原任嗣後虧空錢糧各

官即行革職著落伊身勒限追還若果清完居官好者
該督撫等奏明著通行直隸各省督撫知之

世宗憲皇帝上諭內閣卷四